



Վանից, յունիսի 20-ից, հետևեալն են գրում՝ հայ տառերի գիւտի 1500-ամեայ և հայկական տպագրութեան 400-ամեայ յօրելեանի տօնակատարութեան մասին.

«Վանի Հայկական Բարես. Ընկերութիւնը, ասկէ մօտ մի ամիս առաջ նախաձեռնարկ եղաւ Վանի մէջ տօնել հայկական տպագրութեան 400-ամեակը: Բայց որպէսզի աւելի արդիւնաւոր, ճոխ և համայնական լինէր տօնակատարութիւնը, հրաւիրեց տեղական քաղաքական կուսակցութիւններէ, ընկերութիւններէ, խմբագրութիւններէ և դրպրոցներու ներկայացուցիչներէ լիազօրներ, ինչպէս նաև ժողովուրդի մէջէն քանի մը ականաւոր անձինք՝ խորհրդածիլու այդ խնդրոյն շուրջ, նոյն Ընկերութեան մանկապարտէզի սրահին մէջ: Հանդէսը յետաձգուեցաւ առաջիկայ աշնան (երեի ըստ Մայր Աթոռոյ կարգադրութեան, իբր համազգային մի տօն կատարելու հոկտ. 13-ին):

«Յիշեալ Ընկերութիւնը նպատակ ունի այդ տօնի առթիւ իր նոր հաստատած տպարանէն ի լոյս ընծայել հայկական հնութեանց գեղեցիկ պատկերազարդ ընդարձակ ուսումնասիրութիւն մը»: